

## ეს უკვე სერიოზული განაცხადია

თბილისის. “ლოკომოტივის” სტადიონი. 16 აპრილი.

“დინამო” (თბილისი) - “სპარტაკი” (მოსკოვი) - 2:0 (2:0).

“დინამო”: ურუშაძე, ძოძუაშვილი, კანთელაძე, ხურცილავა, ცხოვრებოვი, პეტრიაშვილი, ილიაძე, ასათიანი, მეტრეველი, გ. ნოდია, გავაშელი.

“სპარტაკი”: კავაზაშვილი, ლოგოფეტრი, ივანოვი, ლოვჩივი, კისელიოვი, როუკოვი, პაპაევი (ოლმანსკი), ჰუსაინოვი, ოსიანინი, ამბარცუმიანი, ველენტიევი (სილაგაძე).

მსაჯი: მ. პინსკი (ხარკოვი).

საინტერესოა ერთი ასეთი დეტალი: სპარტაკელთა ხელმძღვანელობამ წინა ორ მატჩში ტაშკენტსა და ალმა-ატაში გამოიყვანა ზუსტად ის შემადგენლობა, როგორც თბილისში, ამასთან, არც “პახტაკორთან” და არც “კაირატთან” მას არავინ შეუცვლია. ეტყობა, მწვრთნელებს ეს შემადგენლობა ყველაზე უფრო ხელსაყრელ და ძლიერ ვარიანტად მიაჩნიათ.

თბილისში კი ნ. სიმონიანმა შეცვლის მთელი ლიმიტი ამოწურა და ორჯერ გამოიყვანა მინდორზე ახალი მოთამაშე. რასაკვირველია, ეს “კარგი ცხოვრებით” არ იყო ნაკარნახევი და არც მწვრთნელთა ექსპერიმენტული ძიების ნაყოფს წარმოადგენდა. უბრალოდ: სპარტაკელებს გაუჭირდათ, ძალზე გაუჭირდათ და ამიტომ სცადეს ყველაფერი, რათა ეხსნათ ის “ოქროს ქულები”, რომლებიც აუცილებლად შერჩება გათამაშების ცხრილს მეორე ეტაპისთვის, როცა ბრძოლა პირველ შვიდეულებს შორის გაგრძელდება ჩემპიონის წოდებისთვის.

მოსკოველთა განსაცდელი პირველივე წუთებიდან დაიწყო. სულ ცოტა ხანი იყო გასული თამაშის დანყებიდან და ხურცილავამ 3 “სენსის” ჩატარება მოასწრო მოწინააღმდეგის კართან, ამასთან, მისი მესამე დარტყმა ოდნავ ასცდა კარს, თორემ კავაზაშვილი ამ ბურთის ამღები არ იყო. ამას გარდა, სტუმრების მეკარეს სახიფათო ბრძოლაში ჩაბმა მოუხდა გავაშელთან და ნოდისთან.

მაგრამ “სპარტაკი” გამოცდილი გუნდია. მან წამსვე აულო ალლო შექმნილ სიტუაციას, მიხვდა, რომ ტემპში და აზარტში აყოლა კარგს არაფერს მოუტანდა, ვინაიდან დინამოელები ძალიან აგრესიულად იყვნენ განწყობილი, და ამიტომ მაშინვე “გაყინა” თამაში. სპარტაკელები თავდაპირველად არც ცდილობდნენ შეტევის შექმნას. ისინი შუა მინდორში მოქმედებდნენ ხშირი, მოკლე გადაცემებით, უმთავრესად დიაგონალზე ან მინდორის სიგანეზე, იქ, სადაც ხიფათი არ იქმნება, გამწვავებები არაა და ამიტომ მეტოქეც არ იჩენს მაინცდამაინც დიდ თავგანწირვას კომბინაციათა ჩაშლისთვის ბრძოლაში.

გარკვეული ხნით ეს მიზანი მიღწეულ იქნა. დინამოელები თითქოს აპყვნენ კიდევ “სპარტაკს” თამაშის ამ პოზიციურ მანერაში და მინდორზე თითქოს “საყოველთაო მშვიდობა” დამყარდა, მაგრამ უცებ, მე-15 წუთზე, თბილისელთა ნახევარდაცვამ მოულოდნელი, სწრაფი იერიში წამოიწყო. ასათიანმა კარვად შეარჩია მომენტი გარღვევისთვის და სწრაფი რეიდი შეასრულა ისე, რომ ვერავინ მოასწრო მისთვის ბურთის წართმევა. მხოლოდ მაშინ, როცა ასათიანი უკვე საჯარო მოედანში იყო შესული, მას უკნიდან წამოეწია პაპაევი. ამ მოკვიანებულ

გამოდევნებას არ შეეძლო ხელი შეეშალა თბილისელისთვის - დაერთყა კარში და პაპაევმა მხოლოდ ის მოასწრო, რომ ფეხი გამოსდო მეტოქეს. პენალტი. დარტყმა ზუსტი, ცრუ მოძრაობით შეასრულა ილიადიმ, რომელმაც მეკარის მოძრაობის საპირდაპირო მხარეს გაგზავნა ბურთი - 1:0.

სიტყვამ მოიტანა და ილიადიმე უნდა ვთქვათ, რომ იგი ახლა საუკეთესო ფორმაშია. პირველი შესამჩნევი ისაა, რომ იმატა მისმა სისწრაფემ, გაბედულებამ, აქტივობამ. ილიადი გადამწყვეტ სიტუაციებში თამამად იღებს თავის თავზე საიერიშო კომბინაციების წარმონწყობას და დამთავრებასაც, მუდამ უჭირავს თავისი ზონა კოლექტიური დაცვისას. იგი კარგ სამსახურს უწევს გუნდს.

გაშვებული გოლის შემდეგ მოსკოველებმა მოუმატეს ტემპს, აქცენტი თავდასხმაზე გადაიტანეს და საკმაოდ ხანგრძლივი დროით გადასახლდნენ თბილისელთა ნახევარზე. მათ ხშირად გაჰყავდათ წინ არა მარტო ნახევარმცველები, არამედ კისელიოვიც. იყო რამდენიმე მომენტი, როცა “დინამოს” საჯარიმო მოედანზე რამდენიმე სერიოზული მომენტი შეიქმნა და ჩვენი გუნდი მთელი ძალით იყო ჩაბმული ამ უსიამოვნებათა ნეიტრალიზაციისთვის.

აი, ამ კრიტიკულ ვითარებაში მოსკოველთა ერთ-ერთმა მოთამაშემ დაუშვა უხეში ტექნიკური შეცდომა, რომელმაც გუნდს თითქმის არ დაუტოვა შანსი წაგებული მატჩის ხსნაში. ეს იყო როჟკოვი. მან კარიდან საკმაო მოშორებით დაკარგა ბურთი, რომელიც მას უკვე მიღებული ჰქონდა და წინ უნდა გაეგზავნა. შემდგომი ამბები წამის მეთაღში მოხდა: ნოდიამ შესანიშნავი ინტუიცია გამოიჩინა, მაშინვე “მოჰპარა” ბურთი როჟკოვს, სწრაფად გავიდა წინ და კავაზაშვილთან პირისპირ დარჩენილმა შორეულ კუთხეში ოსტატურად დაარტყა - 2:0.

ეს თითქმის გამარჯვება იყო! თითქმის იმიტომ ვამბობთ, რომ სპარტაკელებს არ ჩაუქნევიათ ხელი ამ თამაშზე. მათ დაუყოვნებლივ შეცვალეს ევლენტიევი სილაგაძით და ეს უკანასკნელი მაშინვე აქტიურად ჩაება თამაშში. მისი რამდენიმე ძალზე სახიფათო გარღვევა დამთავრდა ზუსტი გადაცემებით ცენტრში, სადაც ზედიზედ შემოდდიოდნენ ოსიანინი, კისელიოვი, ჰუსეინოვი და ამ ბურთების მოგერიებისას დიდი შრომის გადატანა მოუხდათ დინამოელთა მცველებს და ურუშაძეს. იყო მომენტი, როცა ჩვენი გუნდის კარის ხსნა თითქოს შეუძლებელი იყო, მაგრამ ურუშაძემ შეძლო უძნელესი ბურთის აღება.

მატჩის დასასრულს დინამოელებმა იმავე ტაქტიკას მიმართეს, რასაც ადრე სპარტაკელებმა. მათ დააცხრეს ტემპი, გაამაგრეს დაცვითი ხაზები, ბურთს დიდხანს აჩერებდნენ მინდვრის შუაში და ბოლო ნუთები მიმდინარეობდა ისე, რომ მოსკოველები უკვე დარწმუნებული იყვნენ: წაგებულ თამაშს აღარათფერი უშველიდა, “დინამო” ხელიდან აღარ გაუშვებდა გამარჯვებას.

7 ქულა 8 შესაძლებელიდან! ეს თბილისის “დინამოს” სერიოზული განაცხადია წლევეანდელ საკავშირო ჩემპიონატში. ახლა ყოველ მატჩს, ყოველ ქულას თვალისჩინივით სჭირდება გაფრთხილება.

ბ. ქორქია.

“ლელო”, 20 აპრილი, 1969 წ.